



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT KEDUA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Status Tindakan Susulan Aduan Pencemaran
Udara Dari Kilang Plastik SIK Color (M) Sdn. Bhd.**
- *YB. Puan Teo Nie Ching (Kulai)*

(Halaman 1)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT KEDUA**

Rabu, 10 November 2021

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Status Tindakan Susulan Aduan Pencemaran
Udara Dari Kilang Plastik SIK Color (M) Sdn. Bhd.**

2.34 ptg.

Puan Teo Nie Ching [Kulai]: Terima kasih Tuan Yang di-Pertua. Tuan Yang di-Pertua, isu pencemaran udara dan sungai berpunca daripada aktiviti industri dan perkilangan perlu dipandang serius oleh semua pihak berkuasa setelah berlaku insiden pencemaran sisa kimia Sungai Kim Kim pada tahun 2019 di Johor.

Saya telah menerima aduan yang berlarutan begitu lama, berkaitan dengan pencemaran udara yang dilakukan oleh sebuah kilang plastik yang bernama SIK Color (M) Sdn Bhd yang terletak di No. 97, Jalan Sawit Baru 6, Kawasan Perindustrian Sawit, 81030 Kulai, Johor. Berdasarkan aduan daripada penduduk-penduduk di sekitar kilang, kilang tersebut telah beroperasi melebihi 10 tahun di lokasi sedia ada. Bau yang kuat dan kurang menyenangkan serta habuk yang berterbangan telah dihasilkan oleh kilang tersebut sehingga menjejaskan kesihatan penduduk sekitar.

Saya difahamkan tindakan penguatkuasaan telah banyak kali dilakukan oleh Jabatan Alam Sekitar Negeri Johor (JASNJ), Majlis Perbandaran Kulai (MPK) di premis yang diadu tetapi masalah pencemaran masih tidak diselesaikan. Soalan saya kepada Kementerian Alam Sekitar dan Air:

- (i) sila berikan laporan tentang tindakan yang telah diambil oleh Jabatan Alam Sekitar terhadap kilang tersebut setakat ini;

- (ii) sila berikan status terkini pematuhan piawaian kilang ini daripada segi *effluent*, udara bersih, buangan terjadual di bawah Akta Kualiti Alam Sekeliling 1974;
- (iii) selain pencemaran udara, adakah kilang tersebut akan ataupun pernah menyebabkan pencemaran air di Sungai Pontian Besar?;
- (iv) apakah *time frame* yang ditetapkan oleh Jabatan Alam Sekitar untuk kilang melakukan kerja-kerja penambahbaikan supaya masalah pencemaran tidak berlarutan lagi?; dan
- (v) apakah tindakan selanjutnya jika kilang tersebut tidak dapat mematuhi piawaian di bawah Akta Kualiti Alam Sekeliling 1974 dan juga gagal melakukan kerja-kerja penambahbaikan dalam *time frame* yang ditetapkan.

Sekian. Terima kasih.

2.36 ptg.

Timbalan Menteri Alam Sekitar dan Air [Dato' Mansor bin Othman]: Terima kasih Tuan Yang Di-Pertua. Terima kasih Yang Berhormat Kulai. Tuan Yang di-Pertua, untuk makluman Yang Berhormat, isu pencemaran udara dari kilang plastik SIK Color (M) Sdn. Bhd. telah disiasat oleh Jabatan Alam Sekitar Negeri Johor menerusi beberapa siri siasatan. Susulan aduan yang diterima berpunca daripada bau yang dihasilkan oleh kilang ini, JAS telah melaksanakan sebanyak lima pemeriksaan pada tahun 2020. Manakala, pada tahun 2021 pula, sebanyak sembilan pemeriksaan telah dijalankan.

Kilang SIK Color (M) Sdn Bhd ini menjalankan aktiviti pemprosesan plastik resin berwarna dengan kapasiti penghasilan sebanyak 50 hingga 60 metrik tan dan beroperasi sejak tahun 1999. Bahan mentah yang diterima akan melalui proses *blending*, *extrusion*, *cooling* dan seterusnya dijadikan *palletizer* berwarna. Kilang ini juga mempunyai 12 unit *blending machines* dan 18 unit *extruder machines*. Kacau ganggu bau dikenal pasti berpunca daripada proses *extrusion* iaitu aktiviti memasak resin. Kilang ini juga menghasilkan buangan terjadual bagi beberapa kod termasuk SW305, SW307, SW410, SW104 dan SW417.

JAS Negeri Johor telah mengambil tindakan Penahanan Operasi Kelengkapan (POK) sebanyak enam kali sejak tahun 2020 sehingga kini. Penahanan Operasi Kelengkapan (POK) yang terkini telah dilaksanakan pada 28 Oktober 2021 terhadap kesemua 18 unit *extruder machines* dan masih berkuat kuasa. Pihak kilang diarahkan untuk memastikan sistem kawalan pencemaran udara siap dipasang sepenuhnya bagi

mengawal masalah bau yang dihasilkan semasa proses *extrusion*. Tindakan ini dibuat ke atas semua mesin supaya proses *extrusion* yang menyebabkan masalah bau tersebut dihentikan sementara kerana terdapat kelewatan kepada kerja-kerja pemasangan sistem kawalan pencemaran tersebut. Tindakan ini dibuat susulan aduan yang diterima pada 27 Oktober 2021.

Berdasarkan kepada status pemeriksaan terkini kilang SIK Color (M) Sdn Bhd adalah tertakluk di bawah Peraturan-peraturan Kualiti Alam Sekeliling (Udara Bersih) 2014 dan bawah Peraturan-peraturan Kualiti Alam Sekeliling (Buangan Terjadual) 2005. Walau bagaimanapun, kilang ini tidak tertakluk di bawah Peraturan-peraturan Kualiti Alam Sekeliling (Efluen Perindustrian) 2009 kerana tidak menjana sebarang efluen daripada proses pengilangannya.

Di bawah Peraturan-peraturan Kualiti Alam Sekeliling (Udara Bersih) 2014, kilang ini masih tidak patuh kerana belum lengkap memasang sistem kawalan pencemaran udara. Bagi buangan terjadual pula kilang ini pernah di kompaun di bawah Peraturan 10, Peraturan-peraturan Kualiti Alam Sekeliling (Buangan Terjadual) 2005 kerana gagal melabel buangan terjadual yang dihasilkan. Untuk makluman Yang Berhormat, kilang ini tidak menyebabkan sebarang pencemaran air di Sungai Pontian Besar kerana tidak menghasilkan sebarang pelepasan efluen daripada proses pengeluarannya. Sekian. Terima kasih, Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Khamis, 11 November 2021. Terima kasih Ahli-ahli Yang Berhormat.

[Kamar Khas ditangguhkan pada pukul 2.41 petang]